

院判決事李彥忠為司憲府執義高景虛為司諫既獻納李彥
璟姜暹為弘文館副校理洪天民為司諫院正言

甲午舍人金弘度以三公意啓曰 慈殿移御閭闔至為未安

雖有故事古今異宜請自 上啓達移御空闕何如荅曰出御

閭闔 慈教丁寧聖體康寧為重小弊不可計不允○日微暈

兩耳夜乾方如火氣

乙未左議政尚震右議政尹漑啓曰王子駙馬第宅在閭闔櫛

比之中雖高其墻垣自為一區而其實與民家相接近故疾疫

汚穢之氣易為浸淫豈若深邃宮闕清淨順養之為便况今人

心不靖訛言屢騰以為明年倭寇甚於今年中外危懼莫保朝

夕當此之時 慈殿出御閭闔尤為未安請自 上反覆思量

更啓 慈殿兩空闕中移御至當荅曰以啓意啓于 慈殿則

慈教以為大臣啓之至此當於昌德宮東宮移御焉○夜流星

出天蒼星入天陰星狀如梨尾長四五尺許色白流星出軒轅

星入張星狀如拳尾長三四尺許色白